

四庫全書

集部

欽定四庫全書

集部

洞麓堂集卷七

詳校官庶吉士臣柳邁祖

中書臣劉源溥覆勘

總校官編修臣王燕緒

校對官學正臣翁樹崇

膳錄監生臣左顥若

欽定四庫全書

洞麓堂集卷七

明尹臺撰

五言古詩

恭擬駕祀北郊

館課

姬郊崇泰圻漢時尊汾陰黃琮閱蠲饗黜犢共謳沈虔
矣四望秩昭哉列代欽於皇御靈極洽祀嚴冲襟辨方
規丘澤奠位侔高深陶匏象始制敵祝諧希音明禋協

三五顒觀絕後今良辰撫夏仲濬慮惕時歆行衛戒宵
蹕法從穆招惜綵旂麗彫霽璇蓋軼浮綬緹城虎旅集
輦道龍旗森羣公羅埤埴璆珮鏘琅琳靈樂普衆變嘉
纁薦耦琛仰瞻祗后格萬舞娛歡湛懷柔徧方夏胥懌
來假忱鴻貺數九土茂和滲六陰流潤及川岳滄澤瀾
墳林巨維幹西北鎮柱隆東南永觀翕寧化於單敬祇
心

擣衣篇

館課

明月照高樓流光散幽帷佳人理紈素微步出中閨寒
節戒秋序君令疇寄衣攘袂展皓腕拭杆向南階微芳
動輕袖砧響一何哀盈篋爛繒綺歷歷手自開嗶嗶默
獨念為君密製裁不惜製裁苦但傷人事乖願假中線
迹寄妾日夜懷

別饒子聞

三首

葛生在河渚絲延自結根何意中林楚垂蔓相翩幡人
生托交故義合情與存寧期時命拂懿好不久敦棘爪

有苦實三歲零寒原幸蒙寧采惠棄遠難重論

其二

疇昔懷耿介於心寡馳競幸及華盛年迷方懼縑磷慕
道思有征往阻失阡徑驅車歎長阪欲陟路逾峻中更
同志友閔我力艱疾易此狹邪步遺以千里軻駕騁未
得安乖隔何其迅

其三

軺車戒嚴命肅肅指南彊念子遠行邁執手衢路旁拊

劍激清瑟瑟歌慨以慷矯矯雲中鵠翩翩厲鳴翔戢羽
乍同止展翮忽一方欲從不可得即置終難忘願勗崇
明德功業期自揚

送明泉兄令寧武

三首

曄曄衆星沒鬱鬱晨光布僕夫理前綏轅馬戒中路王
事有嚴程客行當歲暮霜雪日夜零原野不可驚驅車
在迅颺能不馳我慕倉卒暱親懷宛曲分離故

其二

清如玉壺冰直若朱絲絃明心炯自鑒希音誰當傳伊
人秉淵尚植志本貞堅作政遵愿朴理物恒身先古行
寡衆識遲仕及今遷去矣勵令績毖終勤始宣

其三

翔風被百里化行在茲時桃李蔭中陌其下自成蹊欽
欽君子德晏晏淑人儀生草媚騶虞美穀捐竊脂政肅
豈在猛令一民自宜申章聊此贈操袂行當辭

留侯祠

秦鹿突中原六國分橫驚韓酈族先殪子房蓄仇怒千金購死士破產不為顧東見滄海君髣髴平生故潛椎博浪沙乃中副車誤隱身仍俠游索黨哈窮捕函谷氣先奪沙丘魄隨仆壯哉烈士謀濶畧馳雄步搏秦雖云猝智勇亦恢露歸來圯上遊神父識英孺尚公足下履遺我懷中素元韜祕密畫一一潛指悟出說隆準公風雲燿景附嬰降積念抒成立孱宗祚喑鳴扛鼎夫六合恣殘蠹憑陵拔山氣嘔吐阪泉霧笑紆垓下籌立詆榮

陽箸戰利三侯奔業垂四海固儲皇挂贈繳一語開熒
妬昂藏四老人羽翼奮匡護赤鼎既云奠願棄人間務
逃名託輕舉往躡喬松屨偉哉帝者師邈矣人傑慕古
祠翳沙莽雲日蕩回互側思千載人精靈儻此聚劉項
迹已陳黃綺逝安住吾行悲所徂呃吒徐淮暮

吳郡陸義姑姊篇

吳郡義姑姊本家吳東市衣冠世有常煌煌稱陸氏官
學承先民閨風襲女士

一解

孔雀翔翩翩珍樹爰集止

何期雙好匹比翼中摧毀咄哉義姑姊孀守長哀瘁二

解

繹繹碩孔材義姑姊諸弟中弟秘書郎黃門補給事

彊直好諫言出入奉天子

三解

諫書指官邪坐忤謫夷

舊行持舍中兒惻惻悲未已履霜怨無母嗟兒獨焉恃

四解

惜我義姑姊顧弟心燔燬往別重致言弟哉慎飡

履兒在行勿憂姊當急校計

五解

慊慊默自念弟室空

誰視有姊弟足安弟兄姊得置往就弟舍居姊義究終

始

六解

高門結重闕白日照交綺飯膳勅中厨提我雙

亂穉小姑教刺繡大兒訓經旨

七解

弟從遠方來萑蘭

拜階所上壽高堂人男長女亦慧長跪謝姊恩功施流

無止

八解

遠近莫不歎賢哉義姑姊上天錫爾釐黃髮

厭康祉上同義姑名休聲傳世

九解

黃憲墓

漢季多高賢黃生多淑妙白壁出塵匱羣琛仰孤照偉哉弱冠年名流屈乃少汎濫赴深陂清渾同涵抱所悲朗粹質中隕沉靈曜雖寡河汾誤不殊廣川調我行歷

楚墟問道迴山嶠側思千載人悽惻墓常弔

隆中

言懷卧龍叟思窺三顧廬行徒肅車馬遂出襄樊墟羣山
何峻峩樹木紛蕭疎隆中盤絕險曲折迴行輿披莽延
邃歷仄趾遵巖圩攀捫陟中巘始若承門除址蹟辨髣髴
髣徑磴交陰渠瀏瀏六角井瓦甍中堙淤往事既沉泯
巨廟空翼如惟昔賢傑人匡濟偃窮躬躬耕辭亂世匿
景逃空虛時哉不我與逍遙樂只且豈復慕聞達意足

無願餘桓桓漢先主英畧本夙儲神知既相授感會風
雲舒屢駕詎言枉數論心已抒奇功從此奮大業同策
驅志存六合撫力褫羣魄沮炎命雖中殄厥義彰簡書
咄哉鄙俗士嗜議徒呿噓不觀成敗理愚哲并草莛徒
倚當世故三嘆彌愁予

蒙泉

昔人居蒙下而我觀蒙泉
髣髴濠梁意坐嘯挹潺湲
聖功求始達混混嘆逝川
荒言舛不中胡為恣流傳
泉顯

因誰者千秋陸子賢其人久已沒吾懷孰寄宣

慧泉

慧泉出山下映澈分秋毫細石爛苔錦參錯布四遭纖
纖金蓮花吐萼摘文濤異種綿何始千秋不爾薳危亭
俯淺碧雲日相蕩淘側思涪陵迹呢咤令心忉

仲宣樓

昔讀登樓作愛敬公子風今來使荆楚始得觀遐蹤層
構依古堞截嶺臨崇墉長洲被葭蒹廣隰豐稔種曲沮

北盤委巨江南會通川原一以眺帶扼何危雄信美茲
賦作足悲豪士窮瑣瑣劉豎夫安得成巨功有才不顯
用附託能久終居常令思土焉能縻孤踪文人或寡實
片善必有隆君看曹孟德崛起建魏崇頓羅八紘表英
傑歸其籠規業侔前帝魏聲揚鄴中從軍述俞舞頌詠
歸主公宏文并輔武比力懷乃忠國士恥衆遇殊報激
所蒙咄哉斯賦語志若空辭工載感七哀詠灑泣迴高
穹

章華宮

我行鬻熊國南出鄢郢中平原豁千里始見荆地雄下
車訪古蹟遂弔章華宮長隄亘阡術壞道紛科蓬平陸
衍四布禾黍何芄芄宮垣出頽址髣髴辨巖崇瓦甍亂
交錯草樹亦蕪蒙惟昔楚全盛伯業何赫隆衣冠覲華
夏盟會專朝同揚戈指天表威力奔夷戎靈王席強大
侈冒心無窮逞力窺周鼎貪田奪鄭封畋游思土木及
此章華功增臺累百尺開檄延八風雕題與綺絜出入

神鬼工侈縱荒射獵翠豹騰三髮既盛宇薨麗亦驟車
徒攻民罷怨有集乾谿禍始訏成敗理所召自作夫誰
恫君看茲宮土千古啼寒蟲

謁南岳廟

疇昔抱微尚五岳志窺尋繫身清切禁安得諧夙心恭
承帝嘉命羣藩展玉琛炎方宅歷訪因獲散冲襟遂越
三湘浦亦涉衡陽潯駕言謁靈岳清齋秉嚴忱靈陰豁
幽巘朝景耀陽林長松三十里夾濶搖疎森微颺下曲

崦蕭颯竽籟吟危闕聳霄漢朱碧激堂陰羣峰儼翔會
紫翠紛升沉聖人握元化峙流序高深皇皇朱鳥祀秩
禮崇古今惟德理南訛長養參調斟再拜盼庭廡肅穆
懷居歆

明山雲望詩

有序

夫人之思因感以興凡磯於物而不可已者皆思之
橫乎中者也接乎目感乎心於是出之言而情示焉
則思之所存者益著余讀燕崖子明山雲望之述知

感於思者深矣或曰燕崖子以其祖之思繫於雲也
不與唐梁公大行之感異乎夫思其祖思其親之所
自出也謂古今人不同情哉余繹燕崖子之志戚然
有恫於中者為作詩四章欲取以併遣余思云

昔有盧陽令避世當亂殘來家沅水汭幾葉揚翩幡皇
皇肇爾祖發揮一何艱有志鬱不顯混迹丘壘間義聲
動四壤賢哉人共傳

其二

青松生澗底百尺凌寒蒼幽蘭媚浚谷在遠聞芬芳伊
人秉竒尚被褐懷璆琅躬耕沉側陋高風自扇揚偉與
抗孤躅倔立振黔陽

其三

明山舊春水英英含白雲隧墓問誰氏德人在中墳生
時等榮樂亡沒誰獨聞紛紛蓬科下侯王豈辨分君看
茲壟碣千載播清芬

其四

嗟余夙嬰疾惇子悼先民祖書何能讀往筭悲暗塵橫
山麗松柏白雲在高旻感君怵愴意因之歎恨陳懷哉
歌此曲今古同悲辛

壽整菴羅太宰先生八十詩

四首

敬皇昔御極恭嘿萬方理濟濟庶僚升名賢贊天紀早
麓誦作人譽髦興多士耆老布列朝佐業洵光美太宰
奮清時四海望台揆黃麻寢再召黑髮遜三事林居二
十載懋緝力未已潛心邃大業遺策究終始妙識達聖

徵先幾炳國是允觀百代前高風激頑鄙

其二

六藝久不陳聖道日榛翳舊經壞蠹燔大義誰窺諦陋
儒事修補寡力繇深詣采掇疏傳間指意紛膠戾識綿
徵誕誣解說同訛寢詆訟嗟何為歲月徒虛弊茫茫宇
宙業萬代誰區計不有刊鑿儔禹功蕩荒裔東井蝕人
文中洛絕褰揭篤哉夫子心耄年獨高契

其三

金史卷之七
周道中陵夷奇衰互曉詬狹步窘周行曲蹊爭躡踪仲
尼振微言百家廢荒謬浸淫拂朱翟軻書勞隄救嬴秦
潰土崩漢氏承蟻漏梵語譯流沙儵焉惑羣瞽淨智啟
高禪妄儒私牖竇慧悟述心性訓言遭揜糅偉歟困知
辨攘斥功何厚誰哉挹北斗酌公千齡壽

其四

古有不召臣貴道匪高尚進難思所安退勇夫誰抗夫
子擅英聞舊學夙有訪經幃茂沃啟黼閣承弼亮一謝

持衡榮遂諧列鼎養清聲動八表峻節疇匹伉成功奪
寵利盈名虧訾謗不見西昌里新恩流貽蕩饋醕等優
崇彤昭陋錫貺再拜頌武公抑訓諒無忘

述懷二首再寄整翁先生

弱齡慕遐遊五岳志窺尋出門阻長道川莽悲遙深西
昌有靈嶠天柱鬱高岑僊級邇可拾阡術無崎嶇士有
尚千古曠世懷孤心如何遠近企景行不在今締綌抱
悽其緇衣感微吟願因赤羽馭寄扣朱絃音

其二

憶昨東園春桃李競芳媚灼灼揚光華百卉避妍麗盛
時苦不常風霜倏中瘁君看繁豔枝一朝嘆零墜南山
有松栢託根何峭崿勁立千尋岡孑然絕比類洛陽缺
中梁匠石空仰視丹碧煥楠櫟巨材安可致

譚秀才歸茶鄉將過金陵往訊龍湖公詩以述贈
蒼然百里山黃雲抱月水邈迤入茶鄉萃立千峰起維
南表衡岳朱鳥跋其趾沱湘蕩交流秀美蔚茲峙中產

豪俊人經綸奮天紀往往垂盛業清芬振當世譚生何
激昂家聲襲膺仕詩書耀閑閭鐘鼎謝紹嗣一經老不
售耻曳王侯履青衫三十年蕭索困蓬里竭來提殘篋
行歌燕京市騏驎不受縲湛盧空在鞞園橋辭磬折棘
寺暫徙倚邇將反舊廬舟楫問河涘復欲履新屨東南
訪竒詭金陵皇祖基樞垣莫書軌神京列衆英冠裳何
濟濟爾鄉太宰公余也門下士爾今往致訊述余私誦
擬良才出有須國事望章揆三階孰正平萬方注憂喜

道寧管蕭同績必夔龍似巨鏞破哇昏高棟檄顛圮古
來君臣契夾輔茂先治力豈陳列求術乃平居視大賢
沛虬霖小夫懷驥尾余也偃蹇人素業慙樹砥那因歌
子行長言肆紛哆子乎慎勗修茶鄉振未已

送彭審理赴貴藩

二首

丸丸山上栢撼撼澤中葦受氣有脆堅託類故殊只元
颺厲深冬雪霜摧羣卉葦折葉漉流栢也獨藉美之子
相門英擢材自秀偉譬栢在高陵衆木謝勛藿輸之匠

石林采楠隨所使胡不自明揚引身西南舊

其二

宛馬食場藿繫維枉爾良孤鴻號外野慕侶悲殊鄉物
情依所好婉嬾媚同方豈必重風土習性同有常伊余
縻官迹旅食變雲霜迢遙瞻舊邑燕楚渺相望晨昏孰
偕比感子誼故長云何乖羽翼惻惻怨分翔

送薛仲常視學浙江

鷺鷥戢威羽孤鳴灌樹枝搏決豈爾志振迅思有施曉

曉百鳥集孰辨鳶與鷗小夫自齷齪安知曠土規夫子
懷耿亮束髮謝磷緇守官曠歷紀明義皦不虧鉛刀競
銛割葱蘢盧空按持一朝幸淬拭晶芒耀九維往哉恭嘉
命樹教揚民彝蒸蒸於越士攄材信瑰奇彬然陳藝極慕
企得所師巨宋登采斲底法由匠倅農人望歲秉耨艾
勤良苗注射期前鵠教學觀始基儻非抗明德毅律能
不隳拚飛畏桃鳥啄食憂竊脂行矣慎興寢申章竟此

詞

昔我一首送陳先生元之

昔我慕元寶采珠赤水陽
智離與象罔欲遣不得將
至人握元化韞匱儲靈光
在物泯形索焉用求茫洋
六籍開榛穢廣轍亘八荒
吾衰不獲聘有志空徜徉
子負千里志六驥方騰驤
策之墮置野舉步成周行
願子勗終修去矣觀翱翔

秋風二章送楊進士赴守濮州

嫋嫋秋風動翩翩浮雲征遊子
去鄉邑萬里翔帝京幸

被休嘉會通籍踐承明所希頌榛楛焉復顧柴荆涔魚
响縱水檻馬驤長纓抱業久不試積思徒怔營皇皇戒
夙命中心忽若忤起行觀衆宿箕斗交參橫行矣厲迅
往雄劍方夜鳴

其二

浮雲不可極秋風何飄揚舊邑豈無念游子志四方結
髮慕譚討奮欲輔時康一州委不理安事萬里彊刊山
必鍛斧涉水必蹇梁濡足獲深濟脰胫疲奚傷巖巖魯

東郡聖化決難忘姚墟載濮壤媯澤同靈長勉哉慎營
慕神氓其協詳

送呂秀才司教弋陽

客有南來者士服縫掖裾却畧再三拜致我姑蔑書握
絨不及啟問客夫何如憶年方及盛六藝富摧儲擢辭
鮮同匹枝葉分扶疎斷金獲徐子麗澤日相於豈復顧
蓬累計日升茅茹時命久不與此志成敝苴徐也篤古
誼最我周道輿以茲幸紹介躋君白玉除我聞客拱對

揖視氣豁舒念言別徐子契濶三歲餘溫然接所友何
帝偕蛩驢歲陽戒元陸征夫膏其車造士業有職畏簡
嚴居諸駢駢弋陽士譬射得蒲苴行哉勵孤往明當振
爾祛不見大都市魚目喙璠璣士乎慎自立流俗空睚
盱申章述我贈好音願勿虛

送王太史子難赴南少司成三首

靈山韞竒殖幽璞耀華瓊蓂哉深林蔭嘉木擢其英羣
才感聖作茅茹並彙征譽髦獲有造大猷期經程南廡

肇烈祖衿佩揚頌聲行矣闢師軌賢路虞椿荆

其二

嶰竹宣衆律八風從元鐘周王美作人多士盛岐豐帝
學恢始制翬堯麗層穹鬱盤松檜色隱映宮序雄儒生
抗嚴席左右申毛公仁義開型治顏閔成鑄鎔提躬貴
先物作士觀遠功首模推二宋願子希其蹤

其三

騷衷垂新羈蟾蜍拭舊硯我力疲鹽車君子富袞線同

籍金閨省相將媚彘翰每誦代言作令我私慙汗明當
踐臯比經筵抱殘卷河飲渴知滿戰勝癰豈悞憤悱得
所開譬物滋雨渙絙爾朱瑟音遺彼聽者歎

古風二首贈范東明憲使

海邊有靈鳥殊采蔚苞翰饑餐竹花實渴飲砥柱湍德
輝覽八極耀儀阿閣端胡然觸虞罽下息青琅玕冥數
會方塞去矣夫何歎

其二

熒熒芙蓉劍繫君白玉佩芒鉤瑩鵬膏霜花澹磨淬奇
物出有時晶光安可晦提攜意雖愜神理秘幽沕願持
袂祲氛流光曜九閔

風木吟為莆陽康子作也康子痛二親逝不逮養
恒有臯魚之悲乃余悲實同康子故遂作詩二章

夕風吹庭樹柯葉自飄揚胡然抱深痛永夜結中腸嚴
霜悴芳野衆木紛萎黃颯颯風愈厲摧殘增感傷遊子
顧之嘆飛鳥亦徬徨飛鳥戀舊木遊子思故鄉故鄉有

寒原墳塚鬱相望豈不悼存沒劬勞思所將天地靡終
極陰陽浩茫茫逝者寔無作松柏鬱高岡我欲竟此曲
此曲悲且長願假東南翼寄托以回翔

其二

罷君山陽笛置君雍門琴白日照西序聽我風木吟風
木有所思乃在青山岑憶昔舊廬畔衆木紛交森枝枝
自相糾葉葉自相摻當庭足美蔭畧戶無愁陰悲風一
夕至茲木忽摧零摧零曷爾急風起無暫停飄葉墜萬

里游子感其音瑟瑟山上風冥冥山下林哀聲日慘惻
游子抱苦心我歌風木吟淚下同沾襟

紫金雙壽卷詩

峨眉標西極秀色橫高天紫金亘其麓萬古交雲烟伊
昔青牛老流沙逝翩翩入蜀自何歲名山恣歷緣飛昇
事已遠丹室空今傳周翁挺奇秉茲山降靈筌服食苦
鄉氣千載曠一還阿媪亦遐器抱神併娟綿朗然秋水
瞳眴視麻姑僊生子孕奇淑振世稱名賢磊砢圭璋特

清廟麗朱邁何殊魏華存二允顯晉年介齡既同永膺
祉疇爾先貌矣嘉平頌申此黃澤篇

舟發桃源聞趙柱史至不果作寄一首

方舟纜大河三日風務昏今晨適啟曙屏翳簸天門旭
日射蓬牖驚濤鍛怒奔我柁快一鼓檝夫氣騰掀河西
岸邈迤人語忽叫喧傳呼玉節至去帆紛雲屯佇立望
煙渚心同飛鳥翻終然不我覲引眺神空騫徐沛幾程
隔使我嘆川原相思比秋草歷亂中煩冤

送孫郎中子源錄刑江南

金虎戒西維，蓐收整嚴轡。大司告祥刑，狴犴宣幽際。
海嶠皇休偏，遐靡不愜穆。哉畫象仁在，宥羣生暨於繹。
江之南，帝甸交華裔。地大物以庀，民嚚俗始異。孰使麗
爰書，紛然籍獄吏。綸言渙圜棘，星車動軒輊。奏讞布矜
慈，羅拘蕩寃滯。鷹鷂競草飛，豺兕恣林噬。行矣慎平反，
亂庶方塘沸。

小適園菊

衆卉非無艷不列君子堂
睠茲襲幽麗結操獨貞良
餐裛朝露熒熒輝夕霜
休沐下宸直摘情及藻章
陶公詠佳色屈子賦落芳
悠悠快孤適旭日橫扶桑

賦得秋菊有佳色

天然空衆色愛此時菊妍祇託幽人好
肯期俗士憐露英駐搖落霜節抱貞堅
飽潔飡宜對挹清席可前危姿風下整素影
月中傳遙誦潯陽句高慕義熙年

名鳳山詩

有序

嘉靖甲寅孟秋八日余過桐城友人盛古錢汝謙邀
余游於其邑之北山壯其岡巒蔚岐因問以名盛君
曰山故名投子然不詳所自始其東蓋有鳳凰石云
余曰噫嘻詩咏鳳凰梧桐本喻人材衆多作邦家之
美祥也桐邑才賢冠一郡山川之奇實發之而使茲
特山至今缺雅馴之稱其惡乎宜盍削舊名易號曰
鳳山於桐之義固當乎盛君曰然因相與取酒酌山
神聲錫嘉名而載以詩焉

靈峰標塊北踔勢翔天中自古擅奇秀興才孰比隆羽
儀振寥廓人文開蝕蒙佳哉桐君邑茲山名無窮

山泉詩為慎柱史蒙賦

兼艮歸崇址習坎灑駛流高峙層景閔下滲滄溟收元
化肇升降互變分剛柔員象浩疊疊方儀廓悠悠天氣
舉清濁渾沌開沉浮成形啓茫昧神功孰益衰人文宣
理畫大易陳兆繇蒙象告初筮聖功程厥修果以效隆
止育以法游游誰言山匪峻一簣積豈道誰言海匪深

一葦航豈周大哉蒙義訓養正基始猷請歌君子業玩
衆繹所求

伯兄對集陪解示我以長句乃行敬用韻述叙平
生為別并詔兒曹匪言乎詩

清商戒金序大火流坤維我兄松陵至千里歎奔波顛
衣出捧袂問兄求何時十日扁舟阻曠望縣郊圻石城
限一水不即諧襟期展步入中堂形神頓豁披果獲荊
花慰因杼棣萼思憶昔感逝風愜念棘薪吹羨彼食苹

鹿顧懷周道遲常恐將母願不及於隰馳幸以華盛年
校藝入品差兄曰嗟予弟志業勵觀顯顯揚事不究安
用軒爾眉竭來叫閭闔奏對明主知公車三千牘一朝
隨獻持玉螭謝曳履銀魚棄綰絲歸侍半菽歡焉用五
鼎為兄曰嗟予弟丈夫重天彝自古訓忠孝出處孰二
之義行仕乃效詎問崇與庠何圖玄霜變哀颺慘夕帷
庭柯卷落葉痛絕臯魚悲永言畢人世天路從此辭寧
知茲對語述往重淒其勉矢佩兄誨仕學紹先規陪都

壯南服高皇肇巍基胡不暫延止歷覽窮恢奇明發迅
孤棹別恨怍我私溯風遙引領涕下如綆縻戚矣平生
事瀝欵陳今詩

贈懷虛山人歸永嘉

東甌有逸士被褐懷英玉森然抗風翎不受樊籠局放
情雲海間高舉隨黃鵠竭來金陵游素書開一束手抉
岐俞秘遺我長生錄言人氣孔神虛養存緣督周瀾八
埏中攝守僅秭粟吾生詎有涯寄形勞亭毒所貴四大

身不苦六塵觸感君指導意萬累輕蝸蠅願躡無窮門
蕩志扶桑浴去矣行別君期聞閨風曲

懷李進士材二首

赤驥振長纓羞堂狹邪步黃鵠摩天飛萬里詎回顧伊
人秉竒尚千秋曠所慕深心企密玄遠覽超初素一感
嗒爾云遂挹泠然馭九閼浩神往八垠焉足驚大道由
默成卮言虛擾互老氏貴知希宣父戒多數行矣慎周
鼎世方寶康瓠

其二

羅山峻千仞截立章江水章江日夜流蕩瀟無時已孤
標抗不騫蒼然君所視誰言山下雲出入但軒几請看
膚寸興施霖忽千里由來古賢傑經綸業有致多君英
達姿揮斥謝塵軌歸翫山中雲變化在徙倚出奮翊世
功卷舒成寸晷冉冉耀靈車西鞍無停弭吾衰志久荒
跂子天雲漢

送張月山叅軍赴守思州郡

先民有遺訓忠信行蠻方夫苟慎率履焉往非所臧粲
粲月山子俊氣夙開張神駒產渥水萬里看騰驤竭來
事譚討束志翰墨場趺趺茂貞檢折節辭故常既全孝
友思亦昭事學光蛩然捧樞幕慎畏心孔將讒忌紛若
蝟我道胡低昂時清天路廓茅茹拔泰昌專城秉旄節
出守西南疆人言羅鬼域皮弁衣冠裳控馭稍失理干
戈肆跳踰不聞往車誠抗轍紛蜩蟬我告君勿惑制下
重身防參倚恒不違殊類亦同行九夷聖所慕諸夏或

胥戕絃促瑟始戾轡援驂乃揚行哉葆終績在遠期勿
忘何以瀝別歎叙歎陳茲章

贈銓卿沈觀頤郎中考績北上

厯吉整嚴駕逝將趨上都兩驂振盭靽六轡光若濡問
客去何迅報計當歲徂伊昔事縹緗經綸富摧儲抱策
陳大對所志攄元謨遂歷偏邑宰入序曲臺儒寅清勵
夙夜孤操亶弗渝余濫南宮伯抗軾慚先塗幸子致遠
轂翊我周道輿簡書承帝制藻衡列宰夫著績盈函匭

蜚聲播六衢行矣堅乃軸勿辭峻阪驅不見羲和馭奮
殲濠汜隅達人懷遠業卑士局邇圖申章展我贈長風
吹素縐

述學贈孫生棣

學道若觀海茫洋焉所求士有忠信質磨涉得巨舟掛
帆萬里遠何意棹安流望望蓬萊岸咫尺烟雲收士學
誠亦然佻巧徒虛漚孫生惇實者質與道為謀陪雍聽
朱瑟忽爾踰十秋攝袂升我堂故情感敝裘論摧對寒

景今古入冥搜
吾衰志安騁
得汝心先道
願言駕輕筏
共戲三神洲

守素項翁遺德詩

易著幽人貞
坦坦遵素履
邁軸誓不諼
藐哉考槃土
伊人秉淵尚
好古篤倫紀
事母以孝聞
曰繼猶吾恃
蒸蒸成人格
惇修自身始
少學務時敏
匪牽軒冕志
嗜義甘
比飴程力殫
所致足稱古
彥方能使世
尊企上天錫
難
老耄齡厭康
祉有子意承
考典教甄化
理作德洵哲
謀

燕翼遺休軌我歌守素章以著翁行事補亡擬東哲采
風在輜使

七言古詩

邊昭花鳥圖

二百年間稱畫者邊昭花鳥名天下後來林良呂紀徒
意態雖超精絕無第看茲幅亦偉麗格力無乃邊也殊
粉桃上暎雙文鵲飛鳴互繞新篁籜下有嵌石清地迴
白鷺三四交浮躍綵翅繽紛玉羽搖參差麗蕊垂青條

負吭短嘴自喚答荇蓼併動春風嬌憶昨觀畫豪貴屋
邊圖側掛驚衆目斷縑古慘色不凋竟日令人看不足
神情綽約穠素間啄飲細辨毫毛端元圃赤霄虛指顧
翠花金尾愁巘巘茲幅抹染先後同側記邊名異筆蹤
論畫豈必窮真贗為爾灑墨愁春工

吳偉小畫歌為周一書都事題

吳偉之畫工奇蕩此幅潦草筆力逸周君嗜好特衆殊
寶之不減錦屏障清晨示我長安廬指點雲霧生江湖

漁舟顛翻波浪湧
茆屋偃拔風林呼
岸曲島嶼分微茫
髣髴衡巫窺瀟湘
南帆欲掛即未得
見畫黯慘空長望

戲作月川歌酒中調武岡守備周閫使

將軍手掣生蟾蜍
志將掃斷月窟除
匈奴祈連天北黃
河九曲紆將軍吐
氣可使挽瀉傾玉
壺匣中三尺芙蓉
水豪來提舞秋風
裏上天思磔蝦蟇
精桂花老杜僵欲
死碧海仙人夜泛
銀漢槎宮袍解坐
將軍家起援北斗
酌美酒玉簫吹落
南天霞南天萬里
秋冥冥三湘七澤

搖洞庭下看明月出滄海君山一點銀盤青吁嗟武川
之水一斛波明月其奈將軍何願飛玉盞邀嫦娥醉取
僊人三首甕然後揚眉結義天山雪嶠橫雕戈

月川即周別號

荊州明月樓歌酒中作

城上明月樓長在樓中明月應不改古人風流今已空
今人徒悲古人代古人今人已如此人生富貴何用爾
不見武昌長嘯者昔之征南今已矣嫦娥食藥奔青天
廣寒枉守玉兔眠古人有酒不解醉今人空卧黃壚泉

明月對我莫相違樓中為吐銀蟾輝但使朱繒長得酒
玄髻從化霜莖飛山中故人多酒徒明月為我相過無
解拌紫綬辭金馬饒換青絲提玉壺

席上贈東湖老人別歌

東湖老人朱季曹愛客不減扶風豪堂中賢士常滿座
千金一諾輕秋毫買園千畝東湖上結屋却傍湖之坳
水亭風榭窺窈窕花塢竹徑行蕭騷涼颼八月起天末
瀟湘萬里迴長濤青天漠漠數峰小灑然秋色生林臯

是時我解洞庭席東將觀嶽凌煙霄芙蓉天柱裊超忽
羅衣蕙帶紛飄搖逢君一笑不我疑神豁意動心相招
綺障歌絲留娛燕珠鞦舞袖垂纖嬌迴山轉海新知樂
願挽天河傾斗杓明朝暫別莫相問相思尺素飛霞標

和內方先生北征篇贈胡傅二職方行塞

旄頭夜犯燕晉墟敵兵十萬亘穹廬天子九重按神
劍將軍五道馳軍書大同城外煙沙動天驕馬飽矜馳
鞚徑引健肥突朔陲竊窺金帛邀王貢北兵氣勢恣揮

霍撫軍督師計消愕裨校紛驚都護營輶輶併棄嫖姚
幕璽書捷下甘泉宮安邊將佐分才雄郎曹二鎮叅謀
畫司馬六師統制功由來勲業盛文儒把君腰間金僕
姑七擒豈可窮葛亮三法豈必傳穰苴朝廷昨念邊饑
急百萬親輸金帑積閫外投醪氣已增軍中超距材堪
出橫行萬里清塞垣東掃巫閭西玉門鳴鞘直擣陰山
破捲旆迴麾瀚海翻丈夫一身誓許國銘功要勒燕然
石繫頸寧虛賈誼言飛書肯效魯連射腐儒麤狂不料

事風塵躍策志未已願得一請關門纓提攜玉龍並君起

巽屏歌

君不見黃霄之山蜿蜒來百里矯若游龍天中峙羣峰
合沓簇其下煙材霧術莽相亞日南山人何年卜爾廬
溪谷環複岡巒紆中有一山橫抱東南隅屹然碧玉之
屏萬丈孤雲景朝夕秀色鋪吾聞八方人文巽其樞茲
山無乃神之都洞門不交俗士履石室長秘仙人圖金

芝色映丹霞彩玉木膏流紺露珠九笈寶章閱奇詭千
尋鐵鎖懸虛無咄山人兮孰招綠蘿冥冥兮猩鼯號羌
隱處兮余跡焉逝彼屏之曲兮佳可以邀世間萬事豈
有極王侯富貴終蓬蒿不如芒鞋竹杖遊戲此山中猿
情鶴思千古流長謠

石泉子歌

有序

永豐劉某氏以醫行余邑久矣余識之幾二十年往
以所號石泉乞余詩余為之作長句比余歸山中復

多年劉相過出所舊題示余曰公猶記西寺揮毫時
乎余緬然興感憶是時余正少劉亦強壯氣勃勃也
今相顧老矣白晢二毛覩後於今其何如為作是詩
匪專贈劉云

憶昔讀書西城寺劉生手握青瑤字言愛白州山中石
上之飛泉乞余為掃銀河篇剡溪雪藤剗作牋畠如巫
峽片雲飄我前長松陰寺晝不暑虛堂放筆搖蒼煙頃
刻高林動秋色元氣淋漓濕窓壁千尋白練落疑見九

屏青屏寒似入僊情一謝人間世十年宮錦混泥滓青
鞋布襪不可從玉閣金庭空遊戲手驂六龍扶九鸞舉
頸遙望青玉壇奔淙亂射悵泱泱碧壑倒映思潺湲歸
來仍覓西堂卧松栢之苔人行破滄洲客往絕詩筒白
社僧歸虛禪坐人生變化詎有常看君綠鬢凋繁霜余
年四十亦衰久滌毫對酒心茫洋少時豪情今安在撫
卷歌詩神先改匡廬瀑布夢徒期衡嶽水簾吟孰待為
君重賦石泉一長嘆安得白日高丘望遠海

題一山寄跡卷

請息朱絃唱聽我一山吟綺甍繡戶圍碧草王孫第宅
何深沉黃金為塗丹雘錯赤玉垂櫳搖珠箔羅帷不捲
春風迴黃鳥啼斷青林閣嗟君何處得一山乃在曲臺
飛榭窈窕間芙蓉巖嶠媚虛牖翡翠岩壑標重甍雲煙
閼縹緲水石紆潺湲蓮洞之中老僊伯題以寄跡懸軒
顏君有高才異凡俗竒篇秀句紛盈積半畝恨違碧野
居一蓑欲掛蒼林卧期驂白鹿戲嵩陽思跨青牛出函

谷古來貴胄多仙儔豈必蓬巷殊華屋一山何在君神
遊雖名寄跡同真求蓬壺近接九丘島弱水不隔三神
洲虹屐迢遙捐峻嶠風帆咫尺停安流君乎無忘此佳
意超駕雲氣行八州

夜宿桃源縣令長黃蚪峰過訪遂邀宴酒中贈謝
七月大野號天風黃河濁浪高排空桃源縣前繫孤纜
樓船夜宿星霧中桃源縣尹余邦彥扁舟截浪來相見
鳴金列炬開深宵吹竹繫絲諧高宴情歡意洽席屢移

忽憶長安對月時
華省官閒留客醉
仙堂人遠愒余思
十年歸卧滄江流
何知此地逢故游
劇談縱飲不知倦
高歌似動鬼神愁
半酣月落參復橫
馮夷起舞蛟鼉迎
川妃水后互出沒
翠蕤雲梢分縱橫
別君黃鵠不返顧
揮手且入神京去
脫謝慚乏呂虔刀
新詩裁雲贈尺素

漕師劉北華飲余下邳河邳守賀大夫同集

樓船將軍何雄豪
雲艘千簇紛嗷嘈
揚帆立幟大河側
將軍呼集如蝟毛
下邳城下開秋宴
州中太守同歡勸

未欣美酒破舊愁且樂故人諧新面
哀絲急管沸靈囂
醉看北斗傾天河月光劍戟森相映
翠旗羽葆紛盪摩
為君痛飲還高吟一觴一曲散冲襟
明朝掛席彭城去
相思河柳搖秋陰

贈張使君僉憲閩中

長安冠履集如雲風塵中識張使君
牙校雙鞞雕玉勒
馬上揖鞭見顏色翩然顧我苑西廬
傾情倒意無所惜
君本金陵貴公子論交早結天下士
學士聲華在禁林

中丞風采振邦紀祖先父後何顯榮君也有身期自致
竭來獻策復幾年龍劍鬱盤斗間氣聊抒舊學試郎官
忽都新章薦司隸錦衣貴人噓雷電當朝氣勢誰不羨
君持三尺坐幕庭指擊腰間推豪健丈夫躋仕當雄俊
況今執法名逾峻繡斧未經閩嶠烏霜韞已拂燕臺駿
燕臺閩嶠通武夷青谿九曲流歲蕤幔亭玉女裊相柱
桂壑芝巖紛蔽虧憐君標格迴凡俗嘆君美才堪鈞軸
高情雲海自瀟疎長志簪纓豈束縛待成功業報天朝

相期汗漫招黃鵠

白石子篇贈蔡子木出守衡州

白石子讀書白石之山自小放跡煙霞間十八挾策於
明主萬言入奏開天顏飛騰咫尺絕霄漢倏忽羽翰生
塵寰竭來通籍復幾年雲情海思長翻然竒文千篇富
灑落秀句一出爭流傳鯨鯢杼鱗春漲外雕鶚整翮秋
颺前頃欲攝衣尋五岳却歸鼓枻浮三川三川迴沿雲
水曲湖色山光媚幽獨千竹寒通抱甕圖萬樹陰連架

書屋嵇康龍性豈易馴陸機鴻才終誰局著書滿家人
未知好道窮年不驚俗只今年才三十餘飛騰事業夫
何如西昌賢聲動禁匭內河政蹟聞公車昨者銀黃重
綰結赤芾南載垂雙魚衡嶽高高配朱鳥萬古南訛開
化墟帝遣侯邦代秩禮握神長養司其興丈夫立身際
奮揚須挽大軸提天綱為霖施澤霈八表豈得一麾久
炎方火維諸宿麗明作南極一星應壽昌待君了却匡
扶業白石聽歌南山章

孟月行送袁驛丞之江東

孟月雪花飄滿路春風不入長安樹行人鞍馬在路旁
凍鳥無聲飛難去長安今歲何大寒積雪四野浩漫漫
雪中行者江東宰別我欲赴龍沙灣十年奔走長安塵
一官匹馬仍衝津人生苦樂誰能那神龍尺蠖同屈伸
憶爾家近玄壇峯青山遶屋開芙蓉中有釣臺臨碧渚
幽潭曲嶼浮仙蹤爾宗御史垂大名都幕從父繼揚聲
爾今胡為困卑冗跼蹐終日勞逢迎我聞富貴得有命

鳳粒鴟鼠隨天性黃金為注擲道隅瓴甕瓦缶錯相映
爾驛前對大江流南驢北舩無暫休若見昔時南昌尉
但訊掛冠夫何求

里羅醫汝茂別余京師作歌送之并示志

陽春三月黃鳥鳴送汝今出長安城長安南去七千里
故鄉迢遞西江水西江水闊鴻雁稀故鄉今歲尺素違
墳壠松楸颯夜雨庭閣花竹殘春暉三荆前戶昨同蔭
一鳥上林今獨飛茅屋自支楓葉岸釣船誰放蘆花磯

人生性情各有慕焉用但羨黃金扉近者訪舊長安陌
昔年豪族半蕪沒青雲大第橫道傍白日高門少行跡
徒誇盛氣走風雷不信繁華凋露月鳴鐘列鼎況如是
單車獨馬競何益始知富貴盡虛閒側顧勲名堪太息
我今餞汝一杯酒汝歸幸謝舊親友許身稷契事徒期
託勢金張吾不有數莖白髮豈貸人萬里青山空迴首
何嗟要路未先登所幸重權不在手廣袖長裾易飾容
高官厚祿難辭咎聊因送汝動我歌腰間劍氣纏星河

賦得錢塘潮送王繕部赴浙江分司

燕京八月風呼號枯桑古柳紛飄搖
茫然送客感秋思萬里忽憶錢塘潮
錢塘潮勢秋中盛家家看潮簫鼓競
星向海門轉玉衡月當天嶠懸冰鏡
冰鏡玉衡寒盪摩江光潮氣橫天河空
迎登丘望遠海安得挂席浮長波
羨君白舫乘秋風南眺錢塘烟霧中
想歸帝闕誇奇覽定賦觀潮大海東

後一經堂歌

有序

我師龍湖翁作一經堂歌以贈今臨海令宗弟時夫
臺依和之叙曰當宋寇內訌之日武穆誓孤忠提偏
旅破賊之計未決也雲陽長者倡義聲迎餉軍門令
六師之氣不戰而先奮其於成功之助益多矣武穆
不及他語慨然於一經大書之遺若預占其後之必
興者今子孫詩書遠澤延流數百歲仕者不絕承傳
異人神意所默授得非本忠義一心之感協哉翁歌
以贈時夫蓋取類至深矣余故申其義和歌之令時

夫益誦以自勵云

古堂遺址經幾世趙宋之南茲扁傳於乎岳公三大字
蛟龍岌業風雷纏憶昔湖寇始千紀洞庭波立鱣鯨起
舟師既潰瀟湘流敵馬復蹴江淮水武穆此時挺戈出
萬里旗旌映天色賊勢未掃攬搶外軍聲已動軒轅側
當時義士誰赴招雲陽長者吾宗豪先持牛酒犒師旅
暗握蛇鳥陳機韜武穆奇翰由此留一經之堂傳千秋
長有煙雲護鐵畫時看風雨生銀鈎四百餘年詩書澤

簪笏代承何易奕斗菴苞采淪高旻乃今見汝生奇翮
上書北闕正華年專城墨綬何翩翩海上雙鳬遙振履
雲間一鶴隨鳴絃吾師玉署老仙公題詩贈汝懷先蹤
雲仍豈乏菑畲訓臣子要知忠義風君不見武穆高扁
在堂垂無極我師一經之歌將無同

沛中歌贈欽進士赴沛分公司

君不見芒碭大澤噓雲氣沛中子弟興如蜩可憐豪傑
怨秦法徒使黔黎哀鼎沸山東禍首不知數草間瀕洞

昏塵霧沛中壯士三千人奮臂一呼白日暮沛公爾時
拔劍出馬上河山開戰勦滅秦蹙漢指顧間殂醢韓彭
兵未息泗上歸來血洗刀沛中父老迎旌旄遊子悲歌
對舊邑戰士猛氣橫新醪沛中高宴留十日六軍更壽
歡無極千秋萬歲湯沐鄉五劇三條貴游宅誰知今日
歌風臺一丘廢土藏蒿萊請看帝圖有銷歇焉得人事
無傾摧從來時命論通塞蕭樊不遇終誰識君行若見
沛中人為我幸謝屠繒客

五言律詩

館課中秋

今夜中秋月長安萬戶看乍移蘭殿側已隱栢臺端
河漢煙氛淨關山風路寒遙憐舊親友心折向盃乾

館出即事

霾陰開禁籞霽色轉天衢苑柳飄雲絮渠荷散雨珠
時紆金閣步日傍綺寮趨才伎慙虛薄論思一字無

秋日郊寺訪客酌談

細雨城南寺開尊對落暉青山依幔入黃葉映杯飛野
迴塵沙淨煙深草樹微林坳駐安馬取醉欲忘歸

滕縣道中

滕陽三百里大地捲沙霾不辨春陽氣能勝早暝哀柳
長傷碧亂草並阻青回試問東蒙北何山可翦萊

徐州龍山亭宴集

勝地標龍久危亭借鶴傳長河當檻入亂岫裊空懸日
月珠林外風雲倚席前此方多難日匡濟賴諸賢

時數日不雨宴亭中乃忽交澍喜甚有作

出郭時雲合登山好雨來
旱愁開僕御春色起樓臺
喚葉啼鳩聚衝花舞燕迴
羣公鞠疾日此地暢樽罍

雨集少山水部新軒

水部新軒敞芳樽映雨開
竹枝交亂草花片漬深
苔簷溜洪梁落檻峯禹碣來
相將娛夕暝豪意豁深盃

夜過寶應湖作

樓船貪夜涉積水徑長湖
片月懸明晦疎星澹有無
煙

浮蛟客素波湧漢妃珠遙指維揚樹蒼蒼暝色孤

雲居寺燕集

雲居通鳳嶺石閣轉香臺一逕聽鐘入數峯迎戶開湖
光搖綺席天色倒金盃向夜繁星動高歌未擬回

嘯巖寺泊

維舟依古寺解纜下幽源花發渚煙聚草青江雨繁魚
梁交石嶼鳥路界山村坐羨垂綸者看雲過曉昏

普門寺

普門層嶂裏獨逕隱崔嵬寶積煙霞聚香林日月開盤
山亘地出漢水劃天迴注目橋陵遠蒼蒼冥霧來

淳于髡墓

嘆息淳于叟奇談往籍留操豚辭近狎飲鵠辨真游壞
墓藏山曲行人指道周無由聽災輒時鳥自啁啾

習家池

習氏池猶在山公駕豈來豪賢空往舊耕種已亭臺曲
檻鳴泉落危梁疊石摧尋幽聊駐馬暝色下蒼苔

羊侯祠

叔子晉仁人政乃鄭僑似和隣敵止侵戢境民安理祠
比名南常頌流漢曲水千秋峴首碑淚墮襄人士

巴陵道中

曉發巴陵道衝泥突錦韉霧飛翻作雨石出屢迴泉露
圻池荷損風披岸槿捐物情盡搖落吾意竟誰憐

湘陰道中

來往三湘遍真成感倦游煙開林影亂日出鳥聲稠草

木驚時變光陰蕩客愁所思渺天末不見祇離憂

出資陽赴武岡道中二首

合沓千峰裏輕輿鳥背還山花交亂石硤竹裊奔泉巖
合疑無逕林開忽有天永言辭俗鞅自卜掛冠年

其二

屢迴山谷阻時復得幽村路轉松杉密曠開芋秣繁人
煙通絕巔草樹豁高原莫問桃花水前溪亦武源

桃花洞

桃花開幾許客至榭林深洞豁天門霽巖垂石閣陰秦
人家豈在阮客路空尋坐憶青霞髓翻懸王烈心

李泌宅

舊宅迷黃葉荒基隱碧岑昔賢遺跡在流水暮煙深石
折懸蛇逕雲霾伏虎林相唐垂大業終此遂初心

孤山林和靖墓

處士孤墳在疎林映水開湖山千古麗詩句幾人裁鷺
渚寒煙積魚梁晚照來梅花飄欲盡誰為掃荒苔

栖霞嶺謁岳武穆王墓

元忠瞻異代巨廟倚高墳痛矣英雄事悲哉戰伐勲金
牌飛白日鐵戟斷黃雲勁氣號松柏猶疑叱咤聞

祇謁孔林二首

罔極懷夫子瞻思向墓林寢宮寒日閔隧路古雲深尚
想奠楹夢空傳曳杖吟齋心共蘋藻聊以薦居歆

其二

世遠松楸換神遊劍履藏秋陽無改暴梁木自興傷報

德宗千代修禋暨百王側觀孤檜色遺慕宵難忘

高齋

高齋輪鞅絕獨卧碧雲幽山氣青常潤湖光澹不流脫
巾臨竹嶼展席向花丘去此尋真境塵囂安可求

居然亭

地出青蓮宇亭開碧櫺林明湖潏靜影峭壁偃孤陰霧
窟黃熊性煙波白鳥心從來豪達慕不受世籠侵

藕花居


藕花亭子好乃在水中央萬樹菩提色千池菡萏香綵
雲流綺幄珠雨散瑤房此際江妃曲應遺漢水璜

見山

幽人昔解綬草閣賦歸來嗒爾簾櫳啟悠然煙霧開晴
光分逕竹曉色下階苔不盡東籬意千巖秋氣迴

龍游除夕

迢迢游客子歲暮感山川鼓角流殘夜星河轉舊年扁
舟寒水側故國白雲邊未展經時志孤心魏闕懸



洞麓堂集卷七

欽定四庫全書

集部

洞麓堂集卷八

詳校官庶吉士臣柳邁祖

中書臣劉源溥覆勘

總校官編修臣王燕緒

校對官學正臣翁樹崇

謄錄監生臣左顥若

欽定四庫全書

洞麓堂集卷八

明 尹臺 撰

五言排律

送龍良卿使淮藩十四韻

詔使辭天闕，僊槎渺漢津。
炎風吹驛路，赤日轉軺輪。
藩胃尊賢禮，天王展懿親。
元儀開城陞，恤制降絲綸。
駟馬中朝節，輜軒上國賓。
題橋誇昔柱，聘席感前珍。
樹引江

帆色花迎綵服春
紅顏歸錦晝白髮倚門晨
曉夢占魚
筍秋思入鱸尊
驅馳千里道忠孝百年身
憐我迹茲滯
因君淚滿巾
瞻雲亭岵岵步月感參辰
每嘆朋儔隔徒
懷原隰詢若行
逢桂樹願遲晚攀人

送李司成之留雍十二韻

帝宅金陵峙儒垣
壁水開川遺秦鑿迹
山隱晉臨臺
槎漢通南斗
文星出上台
陽城真士範
李白信僊才
日月鰲宮麗
風雲虎觀迴
譽髦歸德造
狂簡藉成裁
六義經

幃展三長史局推論恩終楮薛侍從陋鄒枚赤紱臯比
擁丹心衮職陪金鑄登筍簾玉馭待龍媒時序玄駒變
江湖白雁來愁心牽餞引惆悵對深盃

送歐經歷赴紹興幕十韻

會稽天下郡彊服夏王開海望通秦道山形引越臺霞
峯天姥峻霧澗若耶迴地訝屏分合人疑鏡往來雲沙
張吏幕花鳥傍仙盃麗域東南擅英僚俊乂陪名車應
選御巨室合掄材岸鷁微風柳江蟬細雨槐愁心牽畏

簡夢思引循陔若暇登官閣無忘何遜梅

德州李主政濯纓亭集

使君堂左側一徑轉幽森地阻青林僻亭開碧水深薄
遺投綬意因寄濯纓心邃廨稀人入名園得獨尋官閒
從岸幘客至罷鳴琴偶訪諧沾席交歡展盞簪雲霞流
晚憩蟲鳥助秋吟水盡蒹葭色風疎柿栗陰煙霜行色
變時序旅愁侵短劍晶熒氣哀絲幻眇音淹留成劇坐
感慨搃雄襟憤世思長往懷賢惜所欽有才誰逮古無

力豈忘今去矣吾焉適懷哉此滯淫

毛進士使邊得省十二韻

勅敵窺三輔元戎練五兵紆籌勞聖主獻畫滿神京
烏旆黃雲合魚書白日征三秦憂轉餉六郡募橫行
賈誼單于組終軍闕吏纓時危矜戰績世難耻儒名
捧檄毛生志揚舲祖逖情未辭邛邑馭敢問朔方旌
夢遠蛟龍澤愁深驃騎營空憐新竹筍徒泣舊庭荆

時毛有兄之喪思母益至

故求是行入里梧飄井歸朝柳媚城葵心知抱赤好向太陽

傾

送潘生東田赴南昌因訊水洲諸公

憐君豪俊士白首弊儒冠
旅食燕京市長歌行路難
一羶仍獨抱雙劍向誰看
漫拭芙蓉匣還吟苜蓿盤
匡詩願自解董賦志堪歎
薄宦元饒隱微名不累官
西山長戶牖南浦任波瀾
若過逢梅尉為余訊勉強

送林明府謫官金陵

長安木葉下匹馬問何之
去逐南鴻迅行將北燕隨
風

沙從弋繳歲月任軒楣毛羽寧論鍛絛籠固可辭滄
洲吾道得舊國宦游宜六代豪華蹟三山縹緲思別憐
歌玉樹贈欲把瑤枝童穉情親日江湖歲晚時相逢聊
此地後會定何期若見羊何侶新篇慰我知

送文學趙先生歸致蘭谿八韻

湛湛澌江水東馳嚴瀨長昔賢遺迹故里輝光世
遠人文振風高道術揚前元諸子奮今代數公昌有美
師模抗翻然士幟張衆方觀作止我獨辨行藏豹息元

依霧驚饑祗慕梁送君禾浦上何異別山陽

江太孺人壽詩

二月花欲然鶯聲上苑傳暖萱初媚日慈竹已含煙門
集仙人履堂陳壽母筵珠翹娛景麗綵服戲春鮮宅住
雲霄裏尊開日月邊招邀青鳥馭玩誦赤鸞牋錄受華
存秘教成孟博賢駐齡垂八十累行載三千漢史東征
賦魯詩閔頌篇古來陰化助遺述重彤編

送陳給事赴守衛輝十韻

送君淇上去我思積如何五馬郊原別三年諫疏多吳
干纏斗氣魏闕阻關河目斷天山箭心懸渤海波指庭
軒后草揮日魯陽戈往事嗟難問新詩行自哦一麾茲
出守八使昨催科宿賦誅魯免疲甿病孰摩魯公流昔
頌廉范聽今歌逝矣吾焉訊尺書遲雁羅

送大司寇笠翁先生赴召北上十四韻

紫匭傳新命彤軺發舊京三垣卿月麗五夜法星明鼎
業光儒術彝功闡帝紘禎符占貫索泰緯應階衡祖席

郊闕展離絃渭唱并懷賢憐漢珮惜別詠河纓亭晚吳
天豁江秋蜀漲平掛帆雲出浦倚棹月臨城淮樹行相
引徐山若處橫鱸蓴鄉思劇鴻雪旅情驚白闥懸珂影
朱扉聽履聲祥刑欽呂德淑問想臯名歲晏松筠勁霜
寒葭菼鳴何時尺牋墮一誦慰平生

七言律

元潭觀追憶舊遊作

雪浪閣前草樹春十年重過一沾襟到來剡曲迷新棹

老去延平失舊津歲月豈應塵裏度烟霞自向夢中親追
思未待山陽笛祇對清江已愴神

答張主政鏗贈別之作

乞歸忻荷帝綸頒作賦何須效子山耕隴自看新犢長
釣船時引舊鷗還惠莊談辨六經外臧穀功名一笑間
老矣無心問誰是曳黎聊共片雲閒

寄贈建寧劉丞余嘗過其家

十年不采衡陽杜千里知哦建曲松閩雨幾沾金驤棗

岳雲長護玉芙蓉交游向識茅容異語笑何時程本逢
四十年來湘水別高樓曾復卧元龍

壽郭平翁八十詩

藉甚先朝獻納臣一麾江海謝熊輪
論道慚違黃髮詢八十就言歸耆俊
三千曳履盛儒紳
應吟抑訓當盤几衛武方箴欲耄身

壽三塘老人

老築林間半畝廬三塘雲物在中裾
向人且試岐俞術

醫國應存素難書肘後丹經聊自檢山中瑶草正紛如
何當啟我長生訣拂袖閭風戲紫虛

題宗室瀑泉

西山千尺之湫流注作瀑泉散九秋萬古煙霄飛玉練
一天星斗綴珠旒東平善以涓涔積河間經兼渾灝求
掬勺清淪堪自濯底須雁蕩玩靈湫

寄謝豫章諸士友

歲月虛慚老斲輪江湖聊復寄垂綸久甘檇散藏幽跡

忽拜瑤華感故人
隋珠幸向驪淵得
燕石空兼魚目陳
稷下雕龍誰似者
南洲風義薄高旻

七十自壽

抱柝夷門齒謬同
誰堪黃髮應非熊
朝廷俊宅充多士
社稷匡扶倚數公
散木自甘丘壑卧
非材豈任棟樑崇
能詞吉甫叨承系
願誦中興二難功

和答大宗伯董用均

平生秘迹華陰求
苦憶昔年張益州
舊省愧同何劭入

扁舟忻共李膺留松陵月上青蘋晚
苔水波翻紫稻秋
他日相思期結社休文傳有故時丘

舟中別用均學士有懷

南省幾傷道阻長西清一別祇相望
何期苔水朱絃思
併入松陵白雪章千里神交勞遠憶
十年瀑真感同行
故情盃酒應難述此日懷君意可忘

瀧江別一崖奉常陽谿侍御一首

不見舊交今十年相思瀧水隔長烟
奉常節引金輿側

御史書持玉几邊老去談經匡鼎廢別來辭疾杜冠捐
飛騰宦達成何事笑折晴花舞醉筵

宿陳氏學易堂作

一入瀧溪坐此堂儼然塵意濯滄浪無言自識先天畫
有夢渾遊太古鄉澤豹文章成霧蔚神龍變化蟄淵藏
虛簾長下同嚴肆隱几應知異坐忘

次答文江曾中丞枉訊二首

老向中林習掩扉荒村車馬過從稀偶乘剡水扁舟興

來玩春陵朗月輝
幾日春風雙榻對
千山暮雨一帆歸
新章更枉場駒問
始幸滄洲蚤拂衣

其二

九折摧車憶蜀門
每因叱馭笑王尊
祗隨白鳥忘爭席
敢擬青牛學著言
勇退乞身元不易
傾危視舌亦何存
也知衣白終堪相
肯向羊裘卧釣綸

時中丞以檢壬相
傾乞去故中及之

秋日同諸講友會社堂
遂游梅田洞有作

錦林寒葉灑新裘
石戶高開少皞秋
遇過稷亭談白馬

貪依函谷駐青牛中天秘室仙人隱異代真符使者求
老幸歌游長此地不知塵世隔丹丘

留餘堂詩

留餘堂在碧川潄綺構高開紫桂林一自煙霞辭鳳隱
幾驚風雨動龍吟竇公教擅庭賢盛荀氏家承世德深
共羨石涓遺嗣矩猶傳宋語作心箴

芝林詩

昆山秀挺芝煌煌千林氣吐雲霧蒼綺皓出安鴻鵠計

商巖長詠鳳鳥章金莖夜漬三危潤玉菌朝含五曜光
不用仙經篆圖牒礪山雲水紛流祥

丙子元日述懷

糟粕從誰問斲輪支離七十又逢春生逢四聖休明世
仕列三朝禮樂臣老向星辰忘聽履病將舟楫寄垂綸
子房本乏神仙骨白髮能拋烏角巾

忠愛堂詩

有序

御史大夫楊休公之孫小洞慶雨余里端中之蹕達

好義人也往其從子余館甥幼學不幸夫婦繼殞遺孤幼子女凡五人產籍靡稽擁無任其事者君殫心經紀不稍懈既葬其夫婦乃嫁女之長者其幼亦獲所托焉三子余撫其二幼君取長子教養之產皆分畀諸故僮掌治又以揚休公所創忠愛之堂歲久漸傾圯乃鳩工庀材葺曩敝一新之余閱世所稱伉儷知義士衆矣乃如君篤實無矯襲殆什伯不一二見者故因堂成作七言四韻詩一首識厥美殆匪直以

堂故云

御史大夫之故堂飛甍傑閣森層岡春深燕雀紛成鷺
歲久雲霞仍倬章有美聞孫承奕澤思恢哲祖振華光
新懸麗扁昭前學我詠斯千頌世昌

西苑春晴

閣試

暖氣先浮太液舟晴光漸度上陽樓蠶宮雨霽桑猶穉
穀社煙和草乍柔地靜雲霞依御宿春深魚鳥遲宸游
幽歌逸訓傳豐鎬麗日長瞻聖藻流

五日侍宴龍舟應制

閣試

綵仗葳蕤交帝苑
翠華縹緲拂仙臺
芳辰簫鼓中流競
元嶠風煙竟日迴
好鳥過林迎步輦
新花隔水照行盃
叨從燕鎬觀宸豫
不向橫汾羨漢才

中秋對月

閣試

四海秋期逢此夕
九霄月色對長安
堪憐委地金波動
未厭沾衣玉露寒
兔影纔生雲母帳
蟾輝忽爛水晶盤
懸知永夜關山外
鼓角風淒萬幕看

送蒼梧令

五嶺風煙接九疑
蒼梧形勢控南陲
一尊此送絃歌宰
萬里誰馴鸞鵠姿
象郡久艱秦篚貢
交州猶動漢旌旗
丈夫才力須兼濟
作吏尋常詎汝期

送史簿調陽江

三年嶺縣琴書僻
萬里炎荒劍舄孤
沙草乍辭彭蠡鴈
江花又送海陵鳬
陰陰古霧迷銅柱
炯炯寒冰映玉壺
驚水于今歌節操
看君高義過文儒

奉和朱翁老師病懷三首

久吟碧草思門徑
況對黃昏媚省曹
入夜星文迴黼閣
經秋雲物戀宮袍
持衡合兆三階正
倚杖那思五岳高
但使松喬延服食
可容稷契訪蓬蒿

其二

憶昨鳴鞭趨曉仗
側看曳珮領仙曹
龍墀乍駐尚書履
鳳閣旋紆學士袍
地接勾陳珠斗近
天臨太乙綵雲高
懸知數視明光草
不效元廬閉碧蒿

其三

長擬絲綸承帝制，詎論詞賦冠儒曹。
神鰲鱗甲輝宮觀，織女機杼絢錦袍。
歲月幸依經幄靜，雲霄倍望講筵高。
成蹊漫愧隨桃李，塞逕從誰薶莽蒿。

秋懷

薊野秋交朔氣深，魚陽上谷莽蕭森。
河關迴帶煙塵色，海甸渾迷風雨陰。
天遠芙蓉難獨采，露寒蘭芷莫先侵。
腐儒素食慙何補，草閣荆扉日夜心。

丁酉冬十月雪

可道去年雪太遲今年孟月雪絲絲含風窈窕紛成態
向日輕盈密弄姿田畯好占宜麥兆邊人莫動采薇思
平南凱奏應今至破蔡功成是爾時

臘一日雪

臘月一日寒色異同雲四霈雪紛侵咆林豺虎驕應減
入地螟蝗定幾深白日八埏渾一象玄冰九澤沍成陰
故山梅柳垂垂發折贈誰遺寄遠心

送彭廷化歸雲陽

三月柳花飛禁城
楚南遊子別燕京
江湖氣暖魚龍動
郊澤春多雲霧生
五岳竒探虛夙志
三湘長望渺孤程

因君浩思橫天末
安得吾帆並汝征

時余有行
忽中阻

送符太僕遷韶州太守

武水韶山昔政傳
中朝人士幾君賢
花間此佩雙魚出
嶺外仍迎五馬還
漫憶金珂趨曉竝
長看玉劍倚秋懸
名棠萊竹占今盛
念別無忘寄遠篇

符蓋先倅韶
茲再出故云

送高安吳太史侍母南歸

蓬省僊僚別禁廬
新秋綵服傍慈輿
晴風白渚遙浮鷁
細雨黃河欲上魚
雲引太行千里迅
天懸鉅野一帆虛
憐余四易長安暑
枕扇無因慰倚閭

壽姚封君七十

仲節懸桑陽始達省
郎斑服計趨庭
藤衣老卧江門雪
藥笈閒開笠澤星
遲暮看山勞拄杖
逡巡閉戶了僊經
人間七十古稱少
況睹儀鴻在九冥

送方鴈里理淮獄

淮海風煙漢節馳
僊郎遙出白雲司
江湖漫憶同舟日
花鳥還憐竝轡時
孺子橋荒無舊石
王孫草綠有新祠
英雄事業誰長在
訪古知懸百代思

已亥出京

蓬萊宮觀九天開
鰲禁星辰接上台
豈有文章承帝制
漫令姓字列僊臺
詞垣忝數追趨後
御幄慚叨品校來
暫出京門堪涕淚
致身元乏廣川才

題崔閫帥竹泉卷

將軍作鎮古滁陽
林壑遙分豹節光
僻愛石泉鳴絕巖
側開茅屋倚疎篁
千峰雨送寒流急
一逕雲低暮色蒼
莫笑祭遵不好武
時平無事借鷹揚

別少山水部至呂梁宿酣始解因憶軒中山石有
寄

豪吟別爾看花築
醉裏渾忘下瀨船
片雨忽聽河岸側
數峯猶憶石梁前
誤疑五老虛江霧
却問三神失海煙

相望彭城成阻絕令余長興獨翻然

御史大夫周公旱雩得雨詩示答二首

數月江帆一雨無黃沙颯岸野田枯方春衆盜愁無劇
比郡三農困得蘇敢愛玄牲將奠瘞即防白屋轉流逋
時霖果應南郊雩一夜雲雷土盡酥

其二

督府上卿天下無淮陽出鎮憐彫枯憂時隱念懸魚釜
計國深思入爨蘇民有長謠歌惠恤吏無橫索及窮逋

罪微更愜千人望
霑沃真成九地酥

嚴先生祠堂

江閣斜陰倒碧流
釣臺崛起水雲幽
圖中物色今誰肖
帝側星文不可求
往矣功名成鄧寇
時哉心迹合巢由
南陽舊識狂奴態
底事猶持諫議留

衢州大雨漲作

首夏三衢諸漲發
西安縣前江可憐
亂流湧樹忽失岸
高浪捲花時近船
大地且憂及昏墊
巨川欲濟那回沿

便應即此乘虛筏徑訪羣仙赤嶠邊

龜山

弋陽龜山天下無丹梯紫閣含雲孤羣峰冉冉紛合沓
一水盈盈中迴紆五色金芝秘阡術九文玉笈函經圖
安得遂挾飛僊侶高尋石鼎凌神區

山有紫芝
石鼎二峯

湖上

岸曲風煙霽短槎水樓雲日麗清沙雨殘乍裊新抽竹
春過猶存未落花黑髮何人能解綬青山是處足為家

獨憐無事漁竿侶長卧滄波弄晚霞

長沙賈太傅祠

太傅祠堂何處開長沙舊宅半荒苔
隱思自託三閭弔痛哭誰知七國哀
絳灌在亭能得士古今當路少憐才
請看漢帝何如主宣室仍虛前席回

東湖草堂

我愛東湖湖上居奇山合沓在門除
逕開蔣詡僻還似宅效王維勝亦如
渚曲秋風羣澤雁槎頭春雨聚湘魚

捲簾終日琴書裏
天色雲光相映虛

荊州秋夜

卧病荆南傷客心
井梧埤竹助蕭森
開牕忽見昏星變
隱几遙悲序火沉
南憶佳人香霧遠
北招仙侶綵雲深
螢花棣萼秋虛映
吟倚孤亭思不禁

七月二十七日恭謁顯陵有述

象闕高開古郢州
天垂翼軫照南陬
羣山迴引嵩卽勢
衆水遙交漢沔流
樹裏雲霞飛綵仗
窓中日月閤玄旒

小臣百拜遺弓遠悵望橋山松栢秋

至郢同鄉三臬使集宴因贈

名藩臬使三賢並藉甚吾邦昔見稀
獨夜繁燈張館讌
清秋涼霧拂僊幃
文昌象緯通南斗
執法星芒切太微
持軸願看公等入
早令皇治邁垂衣

漢壽亭侯祠

氣結旌旗慘不舒
將軍遺恨此荒墟
三分割據功誰併
百戰河山勩已虛
義報曹公辭魏得心輕
陸豎計吳疎

至今剗劍留危石勁雨凌風立自如

舟晴

晚日斜光淡自舒三湘秋色映船虛
天開衆岫晴依幔浪裊孤雲影在書
得食空憐陽渚鴈藏身欲釣洞庭魚
迴帆側指朱陵近絕壁長林擬坐予

岳陽樓觀洞庭湖作

萬水東奔江漢迴無邊秋色洞庭開
蕩胸雲霧晴兼吐得意帆檣晚並來
望闕長懸公子思登樓誰是仲宣才

茅茨漂泊魚龍窟滿目蒼葭楚澤哀

雨宴岳樓觀洞庭湖復述

危檻高憑萬里風湖天飛雨映冥濛二儀潏蕩長波外
七澤迴游元氣中綺宴疑張龍女宅瑤絃似聽帝妃宮
酒闌忽見君山出髣髴僊鬟髯髯太空

累石

累石南紆一逕微羣山迴合突成圍渚雲淪淪初凝旆
江雨冥冥忽在衣喚侶漁舟仍獨泛趣人沙鳥故高飛

平生疎豁真成性散髮惟便舊釣磯

涉汨羅水作

路遶忠祠嘆式微草深昏國怨萋菲江流似戀夫君至
山木疑懷公子歸漁父真能辭濁世滄浪還可濯塵衣
祇憐一曲清湘水不向西周抱渭磯

水寺

萬里秋風吹客衣江天晚色靜霏微白雲水寺蟬孤噪
黃葉山房鵲亂飛奉使經年勞館餼辭家每夜夢庭闈

燕中始出花猶凍楊柳今疎客未歸

資陽潭石磯特奇怪良齋趙使君招宴即席二首
獨柱支撐何大奇資潭迴抱迴逶迤林懸石閣飛梁梘
逕折峯亭曲棧垂四海登游無此地百年談笑幾今時
不妨扶醉留歌舞併接涼蟾倒玉卮

其二

百丈孤磯聳碧濤熊幡鳥旆此招邀巖傾訝俯黿鼉窟
石出疑橫烏鵲橋坐久玉繩當戶落酒殘銀漢向盃搖

欲因霞島辭朱紱長挾飛僊倚鳳簫

中秋雲根亭次艮齋使君

此夜中秋人共憐况邀巖洞酒盃前樓臺近映千家月
河漢遙開萬里天玉署相看逢舊侶瑤臺何用問羣仙已
拚爛醉酬清賞不惜虛槎掛斗邊

艮齋舊
館友也

法象巖

法象竒巖靈古雲平岡峭石突續紛林含赤島三花影
洞列丹樞七曜文錦瑟玉笙聞縹緲金芝瑤草閔氤氲

金
卷八
欲尋世外真僊侶暫狎山中麋鹿羣

出法象道林赴周都閫宴集

霧皇衣陰蘿錦嶂開石門秋色淨僊臺不辭關尹青牛訪
遙跨將軍白馬來豪對綺筵探寶缺醉邀羅袖欸金盃
酒闌更秉中林炬為草新題刻紫苔

觀法象諸巖下眺平麓得石丘隱叢莽中竒甚因
命僕夫除穢同周帥取酒酌山神署其名曰崖巒
丘移席再宴

崖峒一丘七洞連崛奇千古霾雲煙旋驅廝隸斲荒蔓
即為將軍排好筵突兀諸峯雲際出扶疎衆樹席中穿
畫圖焉得王丞手勝事長令百代傳

衡州鴈峯寺宴集

衡陽七十二峯開鴈入南天向此迴吳楚山盤朱鳥出
蒸湘水蹴白龍來僧車自演曇花宇佛座長尊法樹臺
五岳尚牽婚嫁在暫將豪興託深盃

上封寺

路轉千峯石棧危上封雲閣半空披乍看西日虛巖落
忽見羣星大壑垂海霧四時流戶牖天風中夜振旌帷
匡牀暫傍銀河宿明發顛崖訪禹碑

方廣寺

衡岳峯陰方廣寺幽林危剝傍天臺水如銀葉烟中落
山作瑤蓮石上開深夜星河朱栢宿高秋雲霧黑潭來
欲辭簪紱隨猿竊留記老僧待客迴

曉望石廩峯欲登不果作

蓮花峯影動參差石廩天梯裊霧危坐惜陰崖蒼蘚滑
吟看峭壁紫羅垂谷聲晝吼蜚廉窟雲氣秋翻霹靂池
安得身輕凌絕頂卧承懸露咽僊芝

峯有雷池風
洞二奇景

浙藩紫薇堂燕集

省署深堂坐竹虛灑然秋雨集交疏涼隨舞葉林中墮
暑向歌筵盞底除宋苑樓臺空昔盛元寮人物豈今如
歡娛况屬豪華地合遣羣公色笑舒

浙藩司蓋宋中
書省元改行臺

紫薇堂山石燕峯岳伯索題

突兀三峯省後開，背林幽閣轉孤臺。
却疑華室中天隱，翻訝秦梁跨海來。
谷黑得無霾虎豹，崖敞莫遣掛風雷。
虛窓竟日珠簾捲，咫尺秋雲萬里迴。

入雲隱諸山作

地入南高峰，盆峻削成無數青。
芙蓉盈盈一水銀河繞，杳杳諸天金界通。
采藥真人不可問，持花聖女應難逢。
廣輪法相俱塵土，淨境攀躋聊扣鐘。

秦宮保封丘祠次王侍御二首

臨陣力拚垂圍邑破賊功輝畫像祠庭草潤含春雨細
階棠陰轉夕陽遲閭閻自此安周甸父老誰忘覩漢儀
二十年前旗幟色傷心空有野人知

其二

風捲長河水作潮尚思虎韞颯金鑣艱危不假夷門節
汴洛真瞻馬柱標張相功名稱益久韓侯惠愛頌邛遙
張相詠知益韓侯稜鎮邛皆有生祠觀風賴有巡方使為采覃懷白屋謠

寄龍良卿補黃門給事

右順門西舊禁扉先朝元鎖侍臣闡地隣密勿通賢諫
天切絲綸出帝畿短草知酬軒后陞何人思補仲山衣
雲霄看爾竒毛逸搏繫功能豈晚違

寄西昌陳子虛入制閣

制閣絲綸名典裁唐臣舊羨子昂才文章已入黃麻選
讐校應兼縹軸開澤豹藏身聊霧雨神龍何地不雲雷
憐余尚滯周南迹倚劍思君日幾迴

濟上坐淺齋中丞半隱園二首

濟上風煙接九河中丞勲業此方多不愁浚鑿勞軒轅
長恐才賢負尉羅白日林中瞻仗鉞青霄花下憶鳴珂
即知詔掌中臺近定許時從禁掖過

其二

小結新亭半隱名林園終日抱虛清臺中吏散鳥爭聚
花外人稀鶴不驚細水自生秋雨後片霞恰映晚池明
桃源古朴還相似不羨平泉卉石并

舟病逢聖壽節有感

憶昨茲辰供奉班五更華蓋侍龍顏朝衣步共爐烟轉
舞珮聲隨扇影還柳底鳴鑾迴御輦花邊貢馬簇天閑
只今卧病湮河曲夢遶鵷行霄漢間

感事二首

庚子
七月

突然散騎滿雲中將帥休誇破敵功坐鎮已無梁督統
提邊誰是石征戎可憐士馬空秦塞即恐烽煙徹漢宮
安得本兵深廟算遍收奇勇策勲庸

其二

扶桑銅柱亦堪危未說天驕擾漢池虎穴橫戈須此日
龍沙拔幟定何時通蠻久絕唐蒙使鑿嶺猶煩馬援師
諸省壯丁輸輓盡無由四海息瘡痍

辛丑元日早朝

玉葉葳蕤絢五雲金莖縹緲出層氛風迴閣道朱衣過
日射鑾軒綵仗分萬國並朝王正朔羣公重煥帝儀文
小臣拜舞三陽會願以康年祝聖君

華蓋入侍

絳炬光繁曉漏催九天春色動蓬萊旌旗併拂星河入
劍珮齊衝月霧來步輦乍停僊樂引侍臣先睹聖顏開
私慙袞職虛何補長傍爐烟候曲臺

和託齋尚書雨憶浣花堂寓宿之作

尚憶西岷雲氣生猶思昏黑蜀星明虛燈獨夜草堂宿
細雨高秋木葉鳴天地名賢空往迹山川文藻漫含情
誰言紫閣青扉夢長動煙猿水鳥聲

潞河別王民瞻舟中

潞河三日維雙楫忽漫相逢得汝舟
闔闔風塵兼晝暝
輝輝霜日向人流孤絃聊為離筵解
九折何妨壯軸游
況是漢廷恩箴宰普天民力困誅求

送劉少憐奉使便省

海國春風白馬驕長天南引使星遙
覃懷柳色迎旌轉
濟汶花光入珮搖萬里江山觀眺得
百年魚笋夢思勞
知君此去承歡近遲日高堂綯錦袍

臘廿日恭上大行皇太后冊諡遇雪

西掖儀成引白麻
詔傳急雪忽飄花
色搖三殿金觚靜
影逐千官縞帶斜
翻訝玉霄行羽旆
暗悲瑤海斷僊車
莫令孝笋重抽土
更使宸衷慟物華

雪後顯靈宮即事

獨馬閒尋羽客廬
雪風吹我白菟裾
冰懸細栢搖珠綴
霧裊深蘿褱綺疏
晝靜虛堂疑斗步
心清妙地愜仙居
更看玉壑煙霄外
結綬垂魚意併疎

聞林旂峯先生家難有懷二首

海上三秋白鴈疎
昨傳消息更愁予
成家但立相如壁
壞宅寧存孔鮒書
暢志酒盃應料理
端居述作復何如
含情漫極天南目
徙倚高臺詠卜居

其二

解綬風塵意得閒
聊思松菊一歸來
逢時獨惜雲中守
抗俗誰憐鄴下才
底用文章矜豹變
須看駕御豈龍媒
瑤華斷絕閩中使
悵望沙村草閣梅

西河

西河日夜羽書馳
直北風煙盡虜陞
列校豈屯秦斥隧
諸邊虛繞漢旌旗
休思驃騎封狼日
恐逼單于祭馬時
聞道凶門推轂少
翩翩紈袴擁新麾

任太夫人壽詩

諫議昔歸奉綵輿
起居今得傍承廬
金鈿白髮行相映
玉袂朱衣座不虛
悅引萱叢迴獻舞
盃含婺彩散門除
寒蘿亦有長年蔓
欲比貞松故不如

送黃材伯學士赴南院

太史新懸學士魚鰲宮南入是僊壺閒牽錦纜白門去
絕勝金珂紫閣趨季子物情周列國左思詞賦盛三都
亦知靜理經綸業定有奇猷翊帝謨

壽錢御醫六十

黃扉通籍自何年聖濟宮中鶴髮僊簪紱行藏逢六十
刀圭功力過三千山中橘樹侵雲長海上桃花炫日鮮
知望燕山思綵服莫停吳澤滯牙船

送錢丈出讞四川

乍看按獄錢塘郡又見詳刑漢竹城吟草幾擁湖月白
法文今動蜀星明春餘劍閣花應少雨過瞿唐峽盡平
皇澤只今周絕域可令冤訟有緹縈

移居西巷次宗弟員外德卿

諱祖懋

綺閣朱樓爛九衢門開曲巷自迴紆短椽聊足此中寄
廣廈能忘天下須玩世漫依金闥隱嬾朝真怯玉墀趨
他年倘使元文就別覓揚雄宅一區

送陸儼山學士南歸

鰲禁儒僊尚黑頭疏承恩許賦滄州舊林白鶴應相待
幽谷黃鸝得並求紫閣講筵懸鳳幄青宮賓闥罷龍樓
此行暫別蓬萊苑還訪扶桑萬里秋

陸以詹事兼太子賓客致仕

壽溶溪劉公六十

溶水東流雙浦深谿山幾曲稱幽尋從教六紀堦莫變
不廢三秋籬菊吟早試青囊留笥記晚遺縹帙薄簾金
懸知繞席班衣舞清宴長開錦樹林

冬日偕甘文學懋獻遊洞辱詩次韻并申後約

冬日洞門引興長瑤華忽捧快余望園中自識無遺畫
指洞上園刪後誰知有剝章洛社烟花還舊約舞雩童冠況
成行鏗然舍瑟前賢事此意春風未可忘

五言絕句

題白鷹

玉刷清秋迴雪翻碧海孤無因擊大野仄立動愁湖

西湖次韻二首

四月過新雨西湖羅綺春荷花嬌綠水妬殺采蓮人

其二

歌筵長白日舞袖亦青春試看西湖上能遊有幾人

開雲樓望岳

熙陽含景麗積雨散層陰因憶開雲日悠然思古今

大湖北山四亭題句

黝然一潭碧對此澹若空物象從生滅泓涵自不窮

右涵

碧

其二

孤亭接混茫高睨衆象表不以登高獨焉知視下小

凌右

虛

其三

半壁倚嶙峋下俯幽潭色潭色與壁陰渟洄不可極

凝右

清

其四

萬木互陰森幽泉細迸瀉借問亭坐人何如馭風者

冷右

然

七言絕句

呂梁歌二首

懸水掀風起白波
呂梁險勢其如何
長鯨怒跋三門石
賤妾勸君無渡河

其二

萬里河流九曲奔
飛湍千尺下龍門
等閒人心不似此
白日雷濤暗處翻

竹枝詞四首題陳侯東華送別圖

東華曉日照江樓冠蓋雲屯擁畫舟借問南陽諸父老
誰能挽取舊岑侯

其二

蓼花新漲動孤城千尺虹梁截岸橫欲繫仙帆無那遠
中流簫鼓望雙旌

其三

三年為政似君無人道萊蕪釜有魚留得家攜青色犢
升朝自駕舊來車

其四

竹枝詞和古桐鄉去思渾牽江水長遙憶東華松獨倚
殘株猶足比甘棠

光山逢劉致卿副使因憶其兄太守二絕句

十年芳草惜離羣海上朱幡憶暮雲何意歸軒停楚澤
萬山黃葉獨逢君

其二

雙垂紫綬綰專城人羨君家好弟兄借問霜飛今夜斧

有無池草夢中生

虞塘曉發二首


絕嶺朝霾雲氣霏日高林際始含暉
層蘿窈窕聞鷄犬知有人家在翠微

其二

逕石杈枒走亂流顛歌古木亦相樛
危峰仄疊幾千轉縹緲惟看白霧浮

山行四絕之一

秋花映路開無數可愛深紅間白枝不聽疎林黃葉墜
風光渾道是春時



洞麓堂集卷八